



Aningaasaqarnermut Nunamullu Namminermut  
Naalakkersuisoq  
/Maani

Ulloq: 17. juli 2013  
J.nr.: 01.32.03-00017

## **Nunatta Karsiata 2012-imut naatsorsuutai pillugit naatsorsuutitigut nassuiaatinut apeqqutit**

- Nunatta Karsiata 2012-imut naatsorsuutai pillugit naatsorsuutitigut nassuiaatinut Kukkunersuinermit Ataatsimiititaliap apeqqutai matumuuna nassiunneqarput.

Nassuiaatit ataatsimut isigalugit naammaginatsumik pitsaassuseqartut ataatsimiititaliap isumaqarpoq. Taamaattorli nassuiaatit kisitsisillu paasissutissiissutigineqartut pitsaassusaannik qulakkeerinissaq Naalakkersuisunit suli eqqumaffigineqartariaqarpoq, taamaallilluni inissititerineq periutsillu assigiiaartut kiisalu kisitsisit eqqortut nalunaarsorneqarnissaat anguneqarsinnaaqullugit, assersuutigalugu takuuk 30.10.22-mut aammalu 40.10.12-imut nassuiaatit.

### **20.05.44 EU-mik suleqatigiinnissamik isumaqatigiissut**

- Namminersorlutik Oqartussat angusassatut naatsorsuutigisaminnik angusaqarsimanginnerat 11,6 mio. kr.-inik isertitakinnerussutinut pissutaasoq aammalu anguniagassat annikinnerusut aallaavigalugit siunissami missingersuusiortoqartassasoq Naalakkersuisunit paasissutissiissutigineqarpoq.

Anguniakkat sorliit Namminersorlutik Oqartussanit naammassineqarsimanginnerusut pillugu nassuiaaqullugit kiisalu angusassanik tamakkiisumik angusaqarnissaq periarfissaassanersoq pillugu isummeqqullugit Naalakkersuisut qinnuigineqarput.

### **24.10.12 Ingerlatseqatigiiffiit akileraarutaat, Namminersorlutik Oqartussat suliffeqarfiutaat**

Suliffeqarfissuup ingerlataasa ilaasa Danmarkimi akileraarutaasussaataasutut isigineqarnerisa kingunerisaanik Royal Greenlandimit 10.991.000 kr.-inik ingerlatseqatigiiffimmut akileraarut ukiumut isertitaqarfiusumut 2007-imut attuumassuteqartoq paasissutissiissutigineqarpoq.

Royal Greenland A/S-imit ingerlatseqatigiiffimmut akileraarutinit isertitat Naalakkersuisunit itisilerlugit nassuiarneqarnissaat ataatsimiititaliap qinnutigaa.

### **24.11.15 Eqquiniaasitsinermit akileraarutit**

1 mio. kr.-it missaannik isertitaqarnerusoqarneranut suliassaqarfiup nalinginnaasumik misissuiffigineqarnera kiisalu ornigunnerit arlallit "kalerriutigineqanngitsut" pissutaasut Naalakkersuisut paasissutissiipput.

Tamanna ima paasineqassava pinnguaatinik neqerooruteqartartut eqquiniaasitsinermi akileraarutininik eqqortumik akiliuteqarneq ajortut?

Taamaattoqarsimappallu Akileraartarnermik Aqutsisoqarfik isumaqarpa pinnguaatinik neqerooruteqartartut ilaat eqquiniaasitsinermi akileraarutininik eqqortuninik piaaralutik akiliuteqarneq ajortut?

### **30.14.29 Pinaveersaartitsineq**

Qinnuteqartut tapiissutinik tunineqarnissamut piumasaqaatinik naammassinninngittarnerannik ajornartorsiut uteqattaarneqartuutut oqaatigineqarsinnaavoq, tassami ajornartorsiut tamanna 2011-mut naatsorsuutigut nassuiaatini aamma allassimammat.

Qinnuteqariaatsimut atatillugu qanoq annertutigisumik ilitsersuisoqartarpa?  
Qinnuteqaatit tiguneqartartut pitsaassusaasa qaffassarneqarnissaat siunertaralugu Naalakkersuisut suliniutinik aallartitsilersaarpat?

### **30.21.02 Atuakkanik kalaallisuunik saqqummersitsinermut tapiissutit**

2012-imi qinnuteqaatit amerlassusiat Naalakkersuisunit paasissutissiissutigeqquneqarpoq.

2012-imi qinnuteqaatinut itigartitsissutit amerlassusiat Naalakkersuisunit paasissutissiissutigeqquneqarpoq.

### **34.12.03 Ataatsimut aningaasartuutit, napparsimasunik angallassinertit il.il.**

Napparsimasut sinerissami napparsimmavinnit DIN-imut angallanneqartut amerleriarsimanerannut pissutaasoq pissutaasulluunniit Naalakkersuisunit naatsumik nassuiaatigineqarsinnaappat.

Angallassinernut suut "peqqutaasarnersut" Naalakkersuisunit nassuiaatigineqarpoq. Angallassisoqassappat piumasaqaatit sorliit naammassineqarsimassappat?

### **34.13.01 Peqqissaaveqarfiit, kigutigissaaneq**

Kigutigissaanermut tunngasuni 2011 aamma 2012-imi atorfiit inuttaqanngitsut (tassa kigutigissaanermi ikiortit il.il. ilanngullugit) qassiunersut Naalakkersuisunit paasissutissiissutigeqquneqarpoq.

## **IRIS**

Akiligassanik suliaqarnermut periuseq IRIS 2012-imi septembarip ingerlanerani peqqinnissaqarfimmi atulerneqassasoq Nunatta Karsiata 2011-mut naatsorsuutaanut atatillugu Naalakkersuisunit paasissutissiissutigineqarpoq.

IRIS tamakkiisumik atorneqalerpa?

#### **40.02.04 Erniallinerit**

Danmarkimi ilinniagaqarnerisuteqarnermi neqeroorutinik taarsigassarsinissamullu periarfissanik danskit ilinniagaqartut pissarsiarisinnaasaannik kalaallit Danmarkimi ilinniagaqartut pinngitsaalillugit atuisinniarneqarnersut Naalakkersuisunit nassuiaatigeqquneqarpoq.

#### **40.90.03 Namminersorlutik Oqartussat illuutaannik aserfallatsaaliineq**

Kotomut pingaarnermut taaneqartumut nassuiaat Naalakkersuisunit itisileqquneqarpoq.

#### **66.01.05 Pisortatigoortumik suliarinninnerit isertitatigut matussusikkat**

Aatsitassanut Ikummatissanullu Pisortaqaarfiup suliassaqaarfiani aningaasartuutit matussuserneqarnissaannut akuersissutinut atatillugu aningaasanut tiguneqartunut AI2013-imi kontop pingaarnep 66.01.05-ip ataani nassuiaat taaneqartoq nassiteqqullugu Naalakkersuisut qinnuigineqarput.

#### **70.01.07 Sanaartornermi oqartussaassuseq**

Kotomut pingaarnermut taaneqartumut nassuiaat Naalakkersuisunit itisileqquneqarpoq.

#### **72.06.51 Inissianik tunisineq – ilanngaaseereerluni tunniussineq**

“Atuisumit piginnittumut” aqqissuussineq malillugu annikinnerusumik tunisineq Naalakkersuisut suliniuteqarnissaannut tunngavissiiva?

#### **73.01.07 Sanaartornermi oqartussaaneq – angallanneq**

Aningaasat amerlassusiattut nalunaarneqartut, taakku eqqortuunerisa uppernarsarneqarnissaat imaluunniit tamatumunnga taarsiullugu kisitsisinik iluarsisanik nassitsisoqarnissaa siunertaralugu, Naalakkersuisunit misissoqquneqarput.

#### **77.05.01 Avatangiisinut teknologii, ingerlatsineq**

Anguniakkanik aallartitsinnginnermut sulisussaaleqineq pissutaasoq naatsorsuutitigut nassuiaatini oqaatigineqarpoq - soorlu aamma 2011-mut naatsorsuutinut atatillugu taamaattoq. Suliassaqaarfimmi sulisut ataatsimik ilaneqarnissaannut AI2013-imi aningaasanik immikkoortitsisoqartoq 2012-imut naatsorsuutinut atatillugu Naalakkersuisut nutaatut oqaatigaat.

Sulisut ataatsimik ilaneqarnissaannut aningaasanik nuussinikkut eqqagassalerinnermut suliassaqaarfimmi atorfinnik inuttaqanngitsunik ajornartorsiut qanoq ililluni aaqqiiviginiarneqarnersoq Naalakkersuisunit nassuiaatigeqquneqarpoq.

**Naalakkersuisut apeqqtinut il.il. siuliani allassimasunut akissutaata kingusinnerpaamik ulloq 7. august 2013-imi tigusissaa Kukkunersiuiinnermut Ataatsimiititaliap naatsorsuutigaa.**

Naalakkersuisut akissutaata itisilerneqarnissaa Kukkunersiuiinnermut Ataatsimiititaliamit pisariaqartinneqassappat ataatsimiititaliaq tamanna pillugu saaffiginnissaaq.

Erseqqissaatigineqassaaq Naalakkersuisut akissutaat Nunatta Karsiata 2012-imut naatsorsuutai pillugit Kukkunersiunermit Ataatsimiititaliap isumaliutissiissutaanut ilanngunneqassammat.

Naalakkersuisut akissutaat paasissutissanik isertuussassanik imaqassappat pisut ataasiakkaat eqqarsaatigalugit tamanna pillugu Naalakkersuisut erseqqissaateqaqqunearput. Paasissutissat isertuussassat Nunatta Karsiata naatsorsuutai pillugit isumaliutissiissummi tamanut saqqummiunneqartussami ilanngunneqassanngillat.

Naalakkersuisut oqaaseqaataat kalaallisut danskisullu nassiuteqqunearpoq. Akissutip qarasaasiakkut nuutinnera uunga nassiuteqqunearpoq: [inatsisartut@inatsisartut.gl](mailto:inatsisartut@inatsisartut.gl)

Inussiarnersumik inuulluaqqusillunga

Kristian Jeremiassen  
Siulittaasoq